

Аллоҳга қасамки, Маймуна кетди



11:06 / 11.03.2020 3878

Маймуна бинти Ҳорис онамизнинг ва у кишининг опа-сингилларининг иймонлари бақувват эканига Пайғамбар соллаллоҳу алайҳи васалламнинг ўзлари гувоҳлик берганлар.

Имом Насайй ва бошқалар Абдуллоҳ ибн Масъуд розияллоҳу анҳудан қилган ривоятда Набий соллаллоҳу алайҳи васаллам Маймуна бинти Ҳорис онамиз, Умму Фазл, Асмо бинти Умайс ва Салма бинти Умайс розияллоҳу анҳолар ҳақида:

«Мўмина опа-сингиллар», деганлар.

Оиша онамиз розияллоҳу анҳо Маймуна бинти Ҳорис онамизнинг мўминларнинг оналари ичида энг тақводор ва силаи раҳмга мойил эканликларига гувоҳлик бериб:

«Аллоҳга қасамки, Маймуна кетди. Албатта, у ичимизда энг Аллоҳга тақводоримиз ва сила раҳмга мойилимиз эди», дейдилар.

Маймуна бинти Ҳорис онамиз ҳадис ривоят қилишда Оиша онамиз ва Умму Салама онамиз розияллоҳу анҳолардан кейин, учинчи ўринда турар эдилар.

Ҳазрати Маймуна розияллоҳу анҳо Расули Акрам соллаллоҳу алайҳи васалламдан 76та ҳадиси шариф ривоят қилдилар. Шулардан биттасига имом Бухорий ва бештасига имом Муслим якка ҳолда, еттитасига биргаликда иттифоқ қилганлар.

Маймуна онамиздан опа-сингилларининг ўғиллари: Абдуллоҳ ибн Аббос, Язийд ибн Мадад ибн ал-Ҳадд, Абдурроҳман ибн ас-Саиб ал-Хуламий, Язийд ибн ал-Асом ва Убайдуллоҳ ал-Жавланий, Сулаймон ибн Ясор, Иброҳим ибн Абдуллоҳ ибн Маъбад, Ибн Аббоснинг мавлоси Курайб, Убайда ибн ас-Сибоқ ва Олия бинту Сабийъ ва бошқалар ривоят қилдилар.

«Ҳадис ва ҳаёт» китобидан